

20 MAY 2003

GERAKAN DAYA WAWASAN DILANCAR TAHUN INI - AZMI

SHAH ALAM, 20 Mei (Bernama) -- Kementerian Pembangunan Luar Bandar (KPLB) akan melancarkan Hari Gerakan Daya Wawasan pada tahun ini bagi menggantikan Hari Gerakan Desa Wawasan yang disambut setiap tahun.

Menterinya Datuk Azmi Khalid berkata perubahan itu sejajar dengan anjakan kepada konsep pembangunan luar bandar yang akan diterajui oleh kementerian itu.

Tumpuan kini adalah terhadap pembangunan pemikiran penduduk luar bandar berbanding pembangunan fizikal sebelum ini, katanya ketika menutup kekhidmatan Sukan Majlis Kebajikan dan Sukan Pembangunan Luar Bandar (Makspen) ke-7, di sini malam tadi.

"Dulu, kerajaan beri prasarana dan kemudahan berbentuk fizikal di luar bandar, sekarang penduduk perlu memikirkan bagaimana ia boleh digemblengkan supaya aktiviti ekonomi dapat ditambah," katanya.

Beliau berkata KPLB akan memainkan peranan merubah corak pemikiran penduduk luar bandar supaya lebih berdikari dalam menjayakan aktiviti ekonomi mereka sendiri.

Perdana Menteri Datuk Seri Dr Mahathir Mohamad dijadual melancarkan Hari Gerakan Daya Wawasan dengan konsep yang baru itu pada Julai ini, tambahnya.

-- BERNAMA
RIZ KHY MOZ